

申冕盟先生年譜附傳
金 姬 傳附別記
阿 計 替 傳

同昌公主外傳
袁天綱外傳



金

姬

傳

附別
記

楊
儀
撰

中
華
書
局

金姬傳序

自余爲童子時。卽得從鄉先生杖履。遊於海巫之巔。仰商周君子之高風。覽吳越興亡之舊跡。未嘗不慨然興懷。慨然太息。蓋將遊心寥廓。欲自掩抑而未能也。稍長。遂得徘徊於金姬之荒邱。躊躇於子壽之廢基。因竊有所聞而感焉。士誠以草莽匹夫。揭竿斬木。出萬死以存餘生。其立業可不謂難哉。方其渡江而南也。吳會未下。雌雄未決。乃先自空其巢穴。以犯不測之險。及其既定吳郡也。又不能收攬豪傑。修明政令。撫民練卒。遠大是圖。而顧乃委政羣小。肆爲淫虐。以游譚之客爲良平。以驕縱之士爲韓白。上下昏惑。淪胥敗亡。終莫能逃一婦人女子之深慮。其得與羣雄角立。祚延一紀。不可謂非幸矣。尙何足論其他哉。子壽身爲異客。業本儒流。初無官守之寄。若余闕之守安慶也。特感守帥結縢之恩。興志士投筆之嘆。竭誠赴難。禍及妻孥。其忠義固昭昭矣。然昧春秋攘夷之義。忘危邦不入之訓。許身太疎。不能無可議者。考諸往哲。其視子路之死於孔悝。殆亦庶幾其無媿歟。及余病廢歸田。日與山僧野老。縱論往昔。又得金姬遺事於謠言。長語殘經敗篋之間。嗟乎。姬以一疋尼弱息。陷身虎穴。一死足以畢其平生矣。乃能發其婉辭妙算。周旋戎幕。口不濡腥膻之味。心不慕金玉之窟。方持成策。已見敗徵。使強暴之主。衆頭凝注。而不敢肆爲侵陵。譬之白壁夜投。貪夫自避。卒能守素完節。從容致身。方之垓下悲歌。以死狗主者。相去豈直尋丈而已哉。此又錄女德者所不當廢也。君子不能無取焉。七檜山人五川楊儀夢羽述。

金姬傳

明 楊 儀 撰

金姬姓李氏。名金兒。濟南章邱人。李素女也。五世祖嘉謨。僞齊劉豫時。以四郡強壯應募。爲雲從親衛子弟。豫愛其年少精敏。又自言與李儔侍郎通譜。時儔亦受僞齊官。因納爲婿。將加爵都尉。嘉謨堅辭不拜。然能謙恭下士。排難解紛。以全善類。人多德之。豫敗。故得免禍。歸田里。爲富家翁。宋亡。其孫以鄉役部發歲運。至元都。嘗夜對月悲歌。聞鄰婦有倚樓而泣者。明日訪其家。則宋舊宮人金德淑也。因過語。德淑本杭人。心懷故土。欲以身託南還。遂得與通。生一子。名都生。竟留都下。父死。從母爲金姓。不復與章邱之族相聞。及長。娶大都女子。復生一女。都生亦早亡。家貧甚。偶章邱有李生至。欲求美妾。謀諸媒侶。即以都生女金氏應之。李生一見。以百金酬。饒眷戀。不復思歸。居數年。亦生一女。名金兒。即姬也。明敏妙麗。世罕其儔。日誦古今經史。及仙佛百家之書。父得張明遠之傳。精於醫卜。悉以其術授之。遂目極元妙。言人禍福。皆響應。父自以爲不能及也。元室政亂。民窮。李生將攜家東還。山東兵阻。從間道出符離。旅寓盱眙。夏暑。金氏嘗裸身納涼。李生見其肘下有一黑子。大如五銖。生曰。吾肘下亦有之。形甚似。豈天以形類作合乎。抑亦同苗裔耶。因各言家世。妻曰。吾先父亦章邱士人之子。本亦李姓。父早喪。從母姓爲金耳。先大父有遺文可驗也。出書示之。備載族屬姓名。李生名亦在焉。生即素。都生即李生祖外婦子。外婦謂金德淑妻固生從女弟也。相顧慚恨。不能自存。金兒聞之。剪髮自誓。願爲尼。以贖骨肉之恥。金李以兄妹別處。求歸愈切。時

至正十四年甲午。張士誠僞稱周誠王。六月己酉。兵陷泗州。李生一家悉被游兵所掠。金兒時年尚未及笄。分配僞太妃曹氏帳中爲侍兒。曹氏頗賢智。偶問及其鄉里。金兒具陳始末。及言自幼祝髮爲尼。頗知經典醫卜雜藝。是歲十月朔。士誠因避苗軍之鋒。自揚州退保高郵。元右丞相脫脫總大兵十萬圍其城。用部將董搏霄之言。分兵復其侵地。天長六合等城。高郵危急。曹氏合金兒卜之。得无妄之小過。執策進曰。天下雷行。剛自外來而爲主於內。其占利正而獲大亨。說者爲負顛顛。趾延延。剛以正之。畏以齊之。乃可得順而合道。變體以柔得中。下拂_{音沸}上悸。趾_{音趨}顛顛。趾延延。剛以正之。畏以齊之。時育物。以常天命也。然其繇曰。伊尹智士。去桀耕野。執軌以強。天祐無咎。主公今方改元。天祐顯著。卜辭事同圖讖。取威定伯。決於此矣。旣而脫脫兵日集。勢號百萬。遂墮其外城。士誠危蹙。計將背城死戰。曹氏復命卜之。得需之坎。金兒曰。雖需於泥。其利用恆。能敬慎則不敗也。又以元準之曰。翼_{而克}之初一。亦并方銳。利進以退其測。曰。亦并方銳。退以動也。蓋陽德能剛能柔。能作能休。見難而縮。家性爲翼。雖勿肆。終無拂。慎勿妄動也。更二夕。時常冬。忽聞殷雷發城中。金兒夜起賀曰。明日可出師戰矣。遂登樓仰觀良久。天將曙。趨告曹曰。龍文虎氣。悉見我營上。時不可失。請急擊之。曹氏卽以其言告士誠。俄而諜者緣城至。言元主有詔削奪脫脫官爵。四更時。親衛鐵甲軍聞報。皆喪氣散去矣。士誠乘隙開門縱擊。大敗元兵。軍勢復振。由是帳中悉以金兒言驗。稱爲姑姑。曹氏寵愛漸加。父母皆留幕下。蓋自被錄以後。雖不復髡緇。而修持如故。明年乙未。江陰大盜朱英。江宗三。自相讐殺。英不能勝。過江求援於士誠。士誠疑爲元兵說。

客按劍臨之。辭拒不許。自夏徂秋。往復數四。英乃盛陳江南饒富。玉帛子女。冠于海內。且曰。妻子皆在軍門。願以爲質。士誠夜入帳中。言於其妻劉氏。遂聞於其姑。同召金兒問之。對曰。伯王之相。自與凡流不類。昨從太夫人帳後。窺見主公顏色。似得之天成。妾見太陰累犯壘壁軒轅。又見太白自五月至九月。累經天。晝見入犯太微。光掃天梁。其應在吳。江南之禍。必不能免。曹氏強之下。乃請扶乩占之。得詩曰。天遣魔兵殺不平。世人能有幾人平。待看日月雙平照。殺盡不平方太平。明日語聞於士誠。時士誠改歷明時。大喜。以爲日月雙照之符。遂定計過江。於是先遣弟士德精選高郵兵三千人。以英爲鄉導。擊橫櫓以渡。至福山時。已逼歲除。英曰。兵貴神速。常熟守臣雖已知公渡江。今當除夕。官民且耽慶節。醉飽。必未有備。乘間急趨之。可卽破也。夜半。兵至九浙江。士德尙疑之。乃遣朱伯昇將高郵兵千人。統率朱英士兵直趨城中。而自將大軍。以英子清爲鄉導。從虞山南入。約明日合兵縣治。其實欲以英嘗敵之先。先是蜀人楊椿字子壽。來吳。自言裔出關西。爲宋少師楊棟之嗣。與楊文靖公五世祖汝江爲近族。因隱居虞山。買田結廬於湖村。又立家廟。與文靖子孫之居邑中者。相爲倫齒。遂士著椿爲人尙氣節。好文藝。鎮帥脫寅知其賢。召入爲館客。旣又署爲參謀。留居郡中。至是聞士誠聲言南渡。脫寅恐常熟失守。先遣椿將兵二千至縣相機調遣。至則與縣達魯花赤議論不合。椿嘆曰。我本邑人。爲元帥守禦。而守臣謀不合。事何由濟。時事可知矣。頃之聞士德已渡江。乃移兵伏虞山北麓興福寺中。計士德必從福山塘直入。將伺其兵半至要擊之。及士德分兵南行。椿夜聞報。率將士越維摩嶺。逕趨湖橋。伏於其家園圃及林木中。以伺。十六年

正月朔。士德將至墅橋。朱清曰。此去湖橋特數里耳。過此則湖山相逼。林樹繁茂。不可不爲之備。士德乃遣其將韓謙、錢輔將兵爲前行。至湖橋。椿從其家廟中鼓噪而出。伏兵盡集。謙輔兵皆出不意。不戰而走。椿追擊至小山。下。士德聞變。疾趨之。潰卒望見士德旗幟。無不反兵奮擊。以一當十。椿見勢不敵。且戰且却。循山而南。復至湖橋。據山麓。整旗肅隊。堅壁以伺。士德仰戰不能勝。三被流矢所中。方自危懼。時伯昇兵已入城。官民棄城走。不血刃而下。遂遣朱英將其部卒。從虞山頂來迎。英望見兩軍相持。疾馳下攻之。椿遂敗。然猶殺傷及蹂踐死者各千餘人。血流遍野。椿僅以身免。逃入郡中。士德既據常熟。用維揚人蘇昌齡計。二月壬子朔。士德兵抵齊門。附城而入。脫寅告急于楊椿。椿曰。士德兵已入城。吾聞巷戰將勇者勝。請以身當大敵。乃自率梟銳直赴士德。轉鬪自辰至哺。士德身被數創。錢輔、韓謙持短兵接戰。亦皆傷重。忽屋瓦飛墜。碎椿首墜馬。士德手握鎗。突前刺椿。洞其胸。椿至死。罵不絕口。元兵大潰。脫寅方與伯昇戰於婁門。聞椿死。亦敗走。匿叢篠中。亂兵殺之。蘇州遂下。士德據承天寺爲王宮。立省院六部百司之職。皆以部將及所親愛者布列。改平江路爲隆平府。以鍛工周仁爲太守。悉以郡中寺院及豪右第宅分給居之。捷至高郵。士德以蘇昌齡爲宏文館學士。遣齋書來迎。士誠以是月二十五日發高郵。至通州。期以三月三日渡江。仍由福山以入。服御器用皆假乘輿。三月朔。奉其母登狼山。觀長江之險。心憚之。設齋祈福。曹氏謂士誠曰。舟中有金姑姑。智算神妙。非虛世間物也。試與議之。何如。士誠曰。我每用其占。皆獲奇驗。軍旅事多未暇令見耳。趣使召至。金兒青衣跣足。垂涕而出。衆皆駭愕。曹氏大詬侍從。令改易衣飾。金

兒收淚徐對曰。妾本俘獲子女。罪當萬死。初見主公。安敢粧飾自便。一時愁眉怨語。體貌不勝。士誠譏
立忘言。注目諦視。唯唯再三。遣去。頃之。亦常服出拜。士誠謂曰。汝事太夫人已久。劉夫人每言汝擡策定
數。灼龜觀兆。變化無窮。然占有數家。汝得其幾。金兒對曰。占有天人家。太乙家。五行家。堪輿家。建除家。叢
辰家。歷家。妾悉嘗究之。惟象緯書龜之占。乃出聖賢正論。故古之卜者。掃除設坐。正其衣冠。起居自誓。以
常鄉人顏色嚴振。以對解婦。解音懈。字通用。法天地。象四時。順於仁義。分策定卦。按式正棋。然後言天地之利
害。人事之成敗。此天下之重事。所以不敢不敬也。後世之下。齊楚異法。瓦玉異用。而其人又多誇嚴虛矯。
居卑行污。曷足與論卜哉。夫卜而不審。不見奪糈。爲人主計而不審。身無所處。故古之聖王。建國受命。未
嘗不寶卜筮以助善。越王勾踐。傲文王八卦。占辭體象。用范蠡。文種爲謀臣。而推遠西子。故能破敵國而
霸天下。桀紂之時。與天爭功。擁遏鬼神。使不得通。又用趙梁。左疆。以爲謀臣。寵妲己。妹喜。以爲內嬖。卒使
蔽其耳目。以亡其國。此皆經史所著。至今不能忘也。士誠又曰。蘇州雖已新服。地方百里。四面皆非我有。
元未革命。人心反側。將奈之何。金兒對曰。軍國重事。非兒女子所能預知。今蒙主公再生之恩。老夫人解
衣推食之愛。不敢不昧死以對。竊聞創業開基。與守成之主不同。非仁與義。無以收四海臣民之望。非才
與智。無以服天下英雄之心。天下神器也。可以智力取。而不可以智力守。可以羣策謀。而不可與羣才斷。
是故君德莫善於運乾剛之斷。莫不善於匹夫之勇。守成且然而況創業之君乎。今日國家大舉。以天時
人事占之。江南政乖民困。徵賦煩劇。威力迫脅。萬姓離心久矣。主公以江淮先聲。士卒効命。乘破竹之勢。

南定嘉湖。北撫淮泗。鼎足千里。角立羣雄。不過一投鞭之勞耳。何用多疑。然聞江南捷至。主公尙未入境。而子女玉帛。盡入私門。府署官爵。已皆濫給。損舉義伐暴之名。失厲世賞功之柄。政教號令。出非一門。入吳之後。方將爲國家深慮耳。後張氏將亡。降將朱伯昇道說客語多取此。時金兒初見士誠。察其意有所屬。每答問。輒高其論。動之。盛陳紀綱。約束其邪思。士誠果竦然改容。致席召前。謂曰。吾聞古之聖人。不居朝廷。必在下筮之中。誠如太夫人言。汝真天人也。安得沉埋在此。且勿他言。但令江波浩渺。天險爲限。又聞江中沙洲盤繞。舟師皆新集。鄉民未能盡悉。汝爲我卜之。得蠱之剝。其辭曰。羊腸九縈。相推稍前。止須王孫。乃得上天。對曰。江中風浪雖險。當自有降人相助。姑伺之。俄而福山富人曹氏。聞士誠將渡。先已脅於士德之威。恐禍及家門。遂發江船百艘。擊牛釀酒。來犒士誠之師。士誠初以癸巳歲起兵。復涓用是月十二日。癸巳入吳。欲知國祚修短。自起焚香再拜。祝蓍卜之。得中孚之晉。金兒進曰。中孚陰陽變動。六位周匝。反及遊魂之卦。互體見民止於信義。辛未土。以壬午水火用事。與乾爲飛伏。晉陰陽反復。進退不居。精粹氣純。是爲遊魂。已酉金。以丙戌火土用事。與艮爲飛伏。其辭曰。日月運行。一寒一暑。榮光赫赫。創業大數。當伺天運一周。乃決國祚靈長。將與日月並明矣。士誠喜。謂金兒曰。作帷幄運籌。多汝之功。伺戎事稍暇。當行再賞。今卽渡江矣。聞汝善詩。能有言以作士氣乎。命將校收庭中列幟。晉金兒前。立綴詩其上。曰。萬隊旌旌臨北斗。連江笳鼓動雄風。君王自欲觀朝日。驅石行看到海東。舟遂發。千艘蔽江而南。金兒父母乘間私問之曰。主公以國祚爲卜。終常何如。金兒曰。中孚之卦。舉元之中。其體最尊。其象則昆命旁薄。正天作主。而必待

思貞常位。乃受其福。至於陰陽神戰。覆常是虞。巔靈之反。或難免也。故先賢命繇。既贊其榮光赫赫矣。又言不可得保。顛覆殞墜。更爲士伍。其意可見。其父曰。然則汝告主公。日月速行。一寒一暑。榮光赫赫。似謂國祚靈長者何居。金兒曰。一寒一暑。天運一周也。歷以十二辰爲一紀。自今起丙申。後十二年丁未。須別有真人當其榮光者矣。但我時命已促。他日常自驗之。其父驚曰。吾本窮途羈旅。俘獲餘生。賴汝天賦妙質。乘時遭際。今江南已下。鼎足勢成。定策帷幄之勳。必首及汝。同享富貴。無異邱子明之遇武帝。何自出不祥之言。若此。金兒對曰。傳有之。美好佳麗。爲衆人患。故騏驥不能與罷驢爲馴。鳳凰不與燕雀爲羣。而賢者亦不與不肖同列。宋忠賈誼。能善季主之言。而不能用。此所謂務華絕根者也。且強得者必暴亡。強取者必後無功。吾不願臣妾若流也。父曰。然則汝事太夫人二載。身煖其衣。腹飽其食。又爲之出謀發慮。動中事機。將何爲哉。金兒以父論不合。笑而謂曰。兒聞之。傳曰。君子雖處卑隱。以辟衆。自厝以辟倫。然而又欲微見德潤。以除羣害。以明天性。助上養下。多其功利。而不求尊譽。此固非吾父之所能知也。父變色作曰。婦人以顏色事人。闔閭之外。皆非其職。雖班大家。蔡文姬。特以文藝顯耳。此外女子。未聞有以雜術名家者。汝醫卜諸伎。皆我親爲授受。雖精微深妙。非盡出我。安得遂出謾語。金兒起對曰。陳君夫以相馬立名。豈謂女子不習他伎乎。非其地樹之不生。非其意教之不成。此在父所授書中。豈亦遂忘之耶。金兒母從旁進曰。吾聞若夫盡十良工之術。能使一伎名立天下。而不聞以言語身質於所尊。今汝論辨紛然。豈欲效安令首示先身之掌。以悟父。王徽女參雙鶴之駕。以辭母乎。因各失笑而罷。士誠既至福山。曹氏

迎致其家。獻金帛米穀，各以鉅萬計。珠玉錦繡，又數十器。及暮，將士縱掠積貨，一夕而空。僅免屠戮而已。時以巨舟重載，恐塘水淺澁，復發士民濬治，乘潮平壅，絕江口。又收曹氏所蓄竹木，每數里爲一牖。舟至則發之，命其將徐志堅督守巡察。故所駕龍舟戰艦，大或萬斛，小或數百。若汎江河，略無阻滯。至九浙港，蘇昌齡進曰：「入郡必由縣治，河狹不能容舟，莫若仍士德舊道以行。」士誠從之。是爲三月十日。時和景明，自郡城以達福山，士馬騰躍，甲仗鮮華，擁塞兩岸。將二百里，旌旗鼙鼓，振撼天地。士誠黃屋左纛，清野安流，舉帷顧盼，意滿志驕。忽追憶金兒占驗之語，使人召之初。士誠見金兒於狼山，屬軍旅匆遽，危疑未安，又爲金兒危言所恐，心竊敬畏，未敢他有所論。及金兒入舟，發容明麗，進止端莊，幃幄侍御，人人自失，不覺心動。紿之曰：「我已默有所禱，汝試卜之。」意欲金兒自爲卜吉卦，成得大畜之觀，進曰：「卜辭不協，不敢以告。」士誠曰：「試舉其辭。」金兒堅不肯發。三強之，乃以繇進曰：「三蛆逐蠅，陷墮釜中，灌沸淅殢，與母長訣。」士誠曰：「吾聞神龜知吉凶而骨直空枯，卜可盡信哉！自起取桃花簪其鬢，笑曰：「以此爲聘。」金兒曰：「吾卜處吉凶，別然否？」多中於人。昔獻公貪驪姬之色，卜而兆有口象，其禍竟流五世。主公方將受命而王，豈忍以妾爲驪姬乎？」士誠不聽。盡出所得曹氏珠錦翠繡，賜之，立命參軍王敬夫撰冊金姬詞。且曰：「伺他日加妃號，位次劉氏。金兒苦辭不可，忽輕翠已羅體矣，知不能免。」乃曰：「妾受老夫人厚恩，不可不先往謝之。」士誠曰：「此固當。」即命護厚女侍數人從之。至曹氏舟，悉屏去盛妝，復其常服，進拜具陳其事。曹氏曰：「汝天賦敏妙，分所當得，不必辭也。」又拜劉，語亦如之。又悉召其父母所親，各敍訖，忽就舟中啓其故篋，出香焚之，向天列

拜長跪私祝。萬目環視。皆不得有所聞。亦莫測其意。須臾忽閉目。奄然無語。父母驚赴。抱起呼之。已絕息矣。士誠倉皇至。執其手。哀慟不已。求良材爲棺。不可得。或曰。曹氏牯木。皆榿枹油杉。可用也。卽出諸水中。架立。爇沸油灌其頂。水下出如注。俄棺成。悉以所賜珠玉從葬。築墳道旁。土既實。乃行。舟次湖橋。昌齡指陳士德戰地。士誠停駐觀之。見陣亡將士屍骨狼籍。積如邱隴。心憾椿。又見椿舊宅祠宇尙存。卽命守將盡撤之。徙建金姬墓道。其園圃中嘉樹珍卉。悉令乘時移種。又發曹氏園亭益之。由是數日之間。花木品列。臺榭參差。老桢喬松。交蔽內外。繁華盛麗。雖出在一時。而棟宇花石。皆仍舊材。儼然一古祠故宮也。又籍楊氏產業。盡給姬親黨之從行者。使留守姬墓。將伺定伯功成。別爲陵寢徙之。未幾。拜其父素爲隆平府丞。時又有陰陽術人李行素爲丞相疑卽其人也。姬母封夫人。與素別院而處。避兄妹之嫌也。其親黨皆得出入士誠府中。十二年。士誠謀取江陰。久未得逞。因感金姬之言。加封姬護國洞元仙妃。饒介之撰文。周伯琦書。刻石神道。國初時與張羽所撰七姬櫛屑志並稱。祠而卜之。其夜劉氏夢姬對劉泣曰。國家舉事大錯。天意已不在。主公若不早圖修德。以塞天譴。來歲此日。已難爲計矣。他日。又夢姬撫士誠二子曰。妾受夫人恩深。有不測當陰庇之。劉氏心私憂懼。祕不敢言。遂預召姬母厚撫之。賞賫日多。人莫知其故。明年。明兵下蘇州。士誠兵敗。城將陷。竟以二子付姬母及二乳母。各給銀三觔。且曰。非不能多也。但汝不可過取。多則反爲吾兒累矣。城破。姬母匿兒民舍。月餘。嚴稍解。乘間馳湖村。視姬墓。則已成邱墟矣。其同時親黨尙多。竄伏山中。漸相聚。言陸將軍從江陰來。亂軍發姬塚。屍已蛻去。棺中惟衣衾在焉。葬姬時事。起倉卒。士誠先以珠寶金銀。盡埋深。

土中其母獨識其處。乃就廢穴旁。又發土數尺。悉存無失者。母盡取之。復自福山渡江。還章邱。二子長。遂冒李姓。亦不復知有張也。洪武末。其季領山東鄉薦。將赴都下。母戒之曰。京師平字街南官房中有一盲姆。年殆八十餘矣。汝可密訪求之。勿令人知。倘猶在。乘間潛往。一見寄聲。我猶無恙。急歸報我知也。兒奉教以行。至京。拜戶部主事。訪果得之。因如母教。就夜潛入其家。姆盲不能視。隔屏問曰。客從何來。乃夜入此。兒答曰。我章邱李氏子。吾母金夫人寄聲問起居耳。姆遽起。捫其面。連披二掌。曰。何物小子。聲之似我弟也。國亡幸留此孽。敢不畏死來此耶。可速還家矣。卽擁出。拒其戶。蓋姆卽士誠姊。得赦不死。當時與聞托孤者也。明日兒遂稱疾還鄉里。其子孫至今編籍章邱云。

嘉靖乙巳夏。予撰慶安鎮平寇記方成。適聞太倉江寇竊發。殺戮守帥。因重有所感而述爲此篇。世之君子。每防患于未萌。桑土之憂。當有聞予言而興起者乎。書以自記。

五川先生著述甚富。如明良記。高坡異纂。世皆稱之。此金姬傳一卷。記元末僞周始末頗詳。惟所載楊椿事。考之當時張文蔚之誅。徐克昭之傳。皆不合。昔人有疑其緣飾形似。多非實錄者。然稗官小說家。好取新奇。間出附會者有之。且聞見異詞。傳疑傳信。奚必讐謬。至其文之華瞻奇麗。實堪與虬鬚紅拂等篇並傳矣。此本出自邑人鄧肯堂手抄。經昔歲于殷敏之茂才處見之。借錄一過。今若雲先生爲刊入叢書中。俾奇文流布藝林。常見有其相欣賞者已。時嘉慶戊辰四月立夏前二日。琴六黃廷鑑識。

金姬傳別記 附錄

李嘉謨不拜僞齊官

李嘉謨世爲章邱農家。劉豫初僭位。外示節儉。而內爲淫佚。人多獻妻女姊妹。求得官免罪。習以成風。又行偶語之禁。喜培植之士。豫妾至一百七十人。子麟妾至一百二十人。嘉謨父懼禍。見其子年少精敏。玉肌瑩白。遂命以四郡強壯應募。爲雲從親衛子弟。時麟駐軍魏博。投謁於靈巖山谷間。冒雨出雲樹中。軍從皆竦立而視。及拜麟馬前。辭旨清辨。了無懼色。拭雨退立。色愈明潔。精彩射人。一時軍門呼爲雲中仙子。麟遂留幕下。稱帳中小李。月餘。豫見問之。自言與李儔侍郎通譜。時儔亦受僞齊官。豫妾錢氏有女玉英。豫所鍾愛。因納爲壻。常與麟並馬出入。寵幸無比。豫欲加爵都尉。嘉謨堅辭不拜。錢氏強之。嘉謨泣曰。我本章邱小民。一旦際風雲。身極富貴。文不知筆硯。武不識干戈。龍冠三軍。富貴萬戶。吾何德以將之。玉英亦曰。父母爲帝后。女爲公主。都尉之職。古今通典。視君才貌。竄出流輩。雖辭之似不能免。嘉謨引妻屏語曰。吾非不知都尉之榮。然視汝父母兄弟。皆無遠圖。昨聞遣劉從善爲河南浪沙官。意在發掘宋家陵寢。吾苦諫不聽。且虐割小民。斬戮忠義。其敗亡可待也。吾與汝身尙不知所託。況更思濫高位。自速夷滅乎。妻曰。今將奈何。答曰。我但言欲待汝生子後授爵。汝當從中勸止之。伺別圖他策。或可免禍也。由是竟不拜官。然能謙恭下士。排難解紛。以全善類。每獨出。則儒衣緩帶。僕從不過三四人。恂恂如一書生。路人

不識者。不能知其爲貴冑也。及劉豫敗。與其妻逃入荆湘。泛舟爲商。竟得免禍。初玉英恃父母之愛。所得賞資金寶鉅萬。悉遺親信。以漸運送章邱。藏諸地中。後金以李儔改汴京同知副留守。嘉謨始歸。遂成富家翁。

嘉謨孫遇宋宮人

嘉謨孫。失其名。以鄉役部發歲運。至元都。嘗夜對月。獨歌曰。萬里倦行役。秋來瘦幾分。因看河北月。忽憶海東雲。夜靜聞鄰婦。有倚樓而泣者。明日訪其家。則宋舊宮人金德淑也。因過叩之。德淑曰。客非昨暮悲歌人乎。李答曰。昨所歌詩。實非己作。有同舟人自杭來。每吟此句。故能記之耳。德淑泫然泣曰。此亡宋昭儀黃惠清所作。寄汪水雲詩。我亦宋宮人也。昭儀舊同供奉。極相親愛。今各流落異鄉。彼且爲泉下人矣。夜聞君歌其詩。令人不勝淒感。當時吾輩數人。皆有贈水雲。因自舉其所調望江南詞曰。春睡起。積雪滿燕山。萬里長城橫縞帶。六街燈火已闌珊。人立玉樓間。歌畢。又相對泣下。私語曰。吾本杭人。心懷故土。得歸雖死無恨。君力能致我還杭否乎。遂得與通。生一子。名都生。從母姓爲金。即姬外祖父也。

金姬題旅舍詩

金兒初度淮。嘗有題肝胎客舍詩曰。馬足燕山雪。船頭泗水雲。客身和鴈影。飄泊過孤村。

張士德用蘇昌齡計下蘇州

士德既據常熟。徵脅士民。旋聚旋逃。竟不滿萬。由是逗撓旬餘。維揚人蘇昌齡。避亂居吳。來謁士德。言平

江達魯花赤六十已病死。哈散沙繼之。新令未定。自用兵以來。官軍死亡大半。新集鄉民。生不習兵。乘其未備攻之。可不勞而定也。若緩之。則杭嘉松江之師在東南。維揚常鎮之師在西北。高郵輕銳半已在此。援兵一至。不獨公不能脫虎口。并高郵亦將不能保矣。士德曰。善。即日署爲參謀。發兵疾走郡中。二十七日。哈散沙與元帥王與敬。合兵三萬。勢號十萬。屯於陸墓禦之。與士德夾河相拒。士德夜遣錢輔。將精兵千人。乘舟自陽城湖抵婁門。遠出兵營背。以縱火焚民居爲號。士德先囊土以伺。夜半。遙見火光起。遂填河縱擊。元兵驚潰。不復能制。哈散沙等反奔入城。門已閉。不納。南走嘉興。僅收散卒千餘而已。哈散沙知城陷。自溺死。與敬後以松江降。

楊椿死節靈異

楊椿既死。士德棄其屍水中。椿妻王氏。攜其子往求不得。徘徊號哭于戰地。明日。巡掠將士過之。遮道扣馬。且哭且罵。將士欲兵之。知爲椿妻子。執送士德。不屈。蘇昌齡與椿友善。進告士德曰。公方開國定基。與江北之時不同。不可不以節義風厲其下。楊椿既死。義其妻子。復敢犯嚴不遜。是妻不失爲烈婦。子不失爲孝子。正宜以義宥之。士德怒解。昌齡遣人扶歸其家。王氏病甚。席地假寐。忽夢椿謂曰。我屍今在張香橋。急收之。妻起扶創往。則屍汧流。倚橋而立。得成禮斂葬虎邱。復神附王氏曰。虜乘我墮馬殺我。已得請上帝。不一年當復吾冤。然吾不願妻子陷虜。後五日來取同往矣。時子穎年十五。女滿奴年九歲。皆無疾。與王氏如期一日並死。明年三月。士德將兵援常州。果亦墮馬。被虎子所擒死。